

四庫全書

集部

欽定四庫全書

集部
精華錄卷七

詳校官侍讀學士_臣陸伯燾

助教臣常循覆勘

總校官進士_臣朱 鈐

校對官學正_臣翁樹棠

謄錄監生_臣朱 坤

欽定四庫全書

精華錄卷七

刑部尚書王士禎撰

今體詩

年來吳梅村周櫟園諸先生鄒訐士陳伯璣方爾
止董文友諸同人相繼徂謝棧道感懷愴然有

賦

載酒題襟處處同平生師友廿年中九原可作思隨會

四海論交憶孔融
春草茫茫人代速
落花寂寂墓門空
白頭騎馬嘉陵路
惟有羊曇恨未窮

漢中府

路遠褒斜夢故園
今朝風物似中原
平蕪蹀躞連錢馬
近郭參差橘柚村
萬疊雲峰趨廣漢
千帆秋水下襄樊
只愁明日金牛路
回首興元落照昏

漢臺

絳灌當時伍黥彭
異代看竟成隆準
帝不屑沐猴冠
磊

落真王氣蒼茫大將壇風雲今寂寞江漢自波瀾

故宮曲二首

溼螢幾點粘脩竹昏黃月映蒼烟綠金牀玉几不歸來
空唱人間可哀曲

往日朱門帝子家柴車一去即天涯平臺賓客今何處
零落小山叢桂花

虛谷菴二首

菴有黃楊
二株最奇

三寸黃柑水浸渠一林紅桂映棕櫚鈎簾恰對中梁色

正好高眠讀道書

太息黃楊樹子前琳宮幾歲飽風烟交柯接葉真憐汝
未似先生厄閨年

南鄭至沔縣道中

黑水梁州道停車問土風沔流天漢外蟠冢夕陽東處
處棕櫚綠村村穰穰紅更須參玉版脩竹賤如蓬

女郎廟

朝過女郎道遙望女郎祠溪水疑環珮春山學黛眉千

林丹橘熟一徑碧苔滋日暮神靈雨西風滿桂旗

沔縣謁諸葛忠武侯祠

天漢遙遙指劍關逢人先問定軍山
惠陵草木冰霜裏丞相祠堂檜柏間
八陣風雲通指顧一江波浪急潺湲
遺民衢路還私祭不獨英雄血淚斑

武侯琴室

竹篠娟娟靜江流漠漠陰至今籌筆地猶見出師心
遺恨成銜壁元聲有故琴千秋絃指外髣髴遇高深

大安驛

犖确三泉縣坡陀一徑開江流沮口合風雨沓中來漢
相經營地氏王駕馭才西窮嶠冢盡節使亦雄哉

五丁峽

徼外蕃王國荒荒巨峽侵龍居三洞祕熊館四時陰
馬何年度金牛此路深五丁虛斧鑿愁絕畏登臨

寧羌州

威遲辭北關浩蕩賦西征天險金牛峽悲歌猛虎行岷

我連雨氣沔漢走江聲三戶遺民少蕭條見廢城

寧羌夜雨

不信無晴日曾聞有漏天武都連夜雨巴子幾人船
山入氏中亂寒臨熨道偏荒城聞鼓角回首意茫然

廣元舟中聞棹歌

江上渝歌幾處聞孤舟日暮雨紛紛歌聲漸過烏奴去
九十九峯多白雲

昭化縣

亂山圍一縣哀柝下初更近郭雙江合扁舟萬里情浪
翻寒月影風急夜潮聲何限人間事茫茫恨未平

昭化夜泊

浙浙風欺枕明明月入船三巴空有淚獨夜不成眠流
宕魚鳧國淒其鴻雁天故園梅信早歸去逼殘年

虎跳驛

路逗蒼溪縣荒涼破驛存漉金稀見艇畏虎早關門水
合南江壯山連大劒昏巴西兵馬後多少未招魂

夜泊雙漩子聞笛

嘉陵江上泊舟時
戍鼓初停月上遲
已聽寒潮不成寐
誰家橫笛怨龜茲

蒼溪縣

萬里行難到
三秋雁不過
蠻江吹積雨
急峽束盤渦
綿谷青山遠
賓人白弩多
泛舟思杜老
漂泊意如何

閬中縣二首

見說閬中好
軒牕臨錦屏
山川無髮髯
耆舊況凋零
殘

壘浮兵氣寒江滯使星忽聞羌笛起風雨晝冥冥
滕王何寂寞江抱玉臺偏沙岸收賓馬湍流激磴船五
城虛夢到三戶有人烟不奈驚搖落魂銷帝子前

閬中感興四首

行役忽永久衣裳白露淒秋風吹劍外客鬢老巴西螢
火飛還沒寒螢咽復啼不堪蜀道雨山霧晝常迷

巴樹小搖落薄寒初中人江山紛暮節風露感蕭晨遠
使非邛杖思歸閱角巾流波三峽外何處覓文鱗

西漢茫茫去來過碧玉樓九迴腸已斷三折水還流涕
淚聞鵑鳥雲山繞劍州老親穿望眼霜雪白盈頭

蜀雨連秦棧秋陰暮復朝山盤黃鵠急江合紫羌遙烏
鵲知何意黿鼉爾獨驕蓬萊不可到回首向風颭

藥物

藥物知何益愁多老病侵眼枯兒女淚心折短長吟鄉
信何時達秋濤日夜深巴猿殊造次悽絕叫楓林

望劍州懷喬文衣

名鉢內邱名士以湖
口令遷守劍州卒官

次公狂自好名字滿人間才士無高位吟魂寄百蠻
書湖口縣生死劍門關太息青蠅弔交州幾歲還

寄綿州守

西南芳草路幾驛到綿州蜀道風雲外涪江日夜流
青楚公壁城郭越王樓故里康浪水何人弄釣舟

龍山驛雨

閬州城邊雲氣浮龍山驛裏雨聲愁遠遊不睡青城地
絕域空悲白雁秋巴嶺稀逢人北去渝江長是水南流

蕭條孤館荆榛夕更指千峯入漢州

富村驛雨

陰蟲何太苦戶外即蒼山急柝侵孤枕秋河落百蠻燈
昏山鬼逼雨止蟄龍還一夜瀾江水愁人淚點斑

天馬山雨行

兩炬殘更裏亂山高復低疾風吹白雨折坂下青泥詰
屈穿牛角縱橫印虎蹄廿年餘戰骨何處聽荒雞

鷺溪

剩水殘山祇益愁梓州荒絕接隆州眼明今日鹽亭路
十里鷺溪碧玉流

鹽亭縣南渡梓潼江

南下孱亭路千峯挾雨秋江潮不送客獨向射洪流

秋林驛雨

積氛常不徹天地日冥冥俗雜蟾夷種林深虎豹窟荒
村陰峒黑寒夜鬼燐青夢裏夔門路開頭下洞庭

涪江

十日巴西雨艱難到梓州晚晴見涪水清絕抱南樓不
見千頭橘空驚萬里秋尚餘登覽興留眼望牛頭

潼川懷少陵

返景下東津扁舟涪水濱女牆崩積雨郡郭入荒榛山
夕烟花少江流戰伐頻飄零思弟妹嗟爾杜陵人

中江縣

慘淡黃雲暮行人出草萊風濤兩江合斜照亂峰開秋
老飛鳥縣鄉遙戲馬臺郛筒何處是一月罷銜盃

天柱山絕頂望見岷山作

鞍馬衆峰頭蒼茫萬里收岷山橫塞出灌口接天流要
害三城戍邊防八月秋大荒飛鳥外眼底盡姚州

山中有蟲聲如擊磬甚清越蜀人謂之山子又有
花名龍爪甚艷偶成絕句

稻熟田家雨又風枝枝龍爪出林紅數聲清磬不知處
山子晚啼黃葉中

題漢州驛壁

漢州城郭劫灰前房相西湖有斷烟更問臉波添幾許

昨宵金雁驛中眠

唐人漢州詩十日醉眠金雁驛臨岐無限臉波橫

望青城山

雲氣連西域名山作漢標千秋軒帝蹟每夜岳靈朝玉宇凌丹壑神鸞下碧霄丈人一招手天路未應遙

彌牟道中望八陣圖遺址

落日彌牟道霜風百戰場青天迴玉壘遠樹出華陽陸海三都濶雄圖八陣荒卧龍虛故蹟駐馬惜降王

新都縣題楊升菴先生故宅

有三桂樹尚在

侍臣遷謫後常憶泰陵園詞賦留金齒生還望玉門交
州無士燮南海得虞翻廢宅西風裏連蠅桂樹存

防秋

聞道防秋急千山復萬山傳烽來棘道插羽過靈關屬
國何當絕懸軍且未還卻思漢丞相心力盡征蠻

登成都西城樓望雪山

秋老錦官城西風捲旆旌霜高犀浦落日出雪山明黎

雅初增戍松潘未罷兵誰能凌絕頂萬里一崢嶸

金方伯邀泛浣花溪二首

解纜江村外溪沙失舊痕夕陽來灌口秋水下彭門清
吹臨風緩神鴉得食喧百花潭上好新月破黃昏

萬里橋邊去還多弔古情人烟過蠶市新月上龜城寂
歷更漏發蕭條鱗甲生迴看草堂路脩竹水蕪平

王蜀徐妃

詩又驅金
翠入龜城

九日謁昭烈惠陵

萬里登高日橋山白露寒至今悲蜀帝何處問祠官
香衣冠閉淒淒封樹殘錦江非渭水猶作霸陵看

武侯祠別鄭次公水部

白雁三秋候青山萬里橋與君俱絕域此別更魂銷
遺廟丹青盡荒陵草木凋

祠西即惠陵

平羌江上水相望隔風

潮

金花橋道中作

半年浪迹錦城遊纔數歸程已暮秋
晚照開時見千里

寒鴉飛盡過雙流
眼明脩竹橫塘路
心逐江雲下峽舟
異域忽驚搖落久
今宵一醉失鄉愁

雙流縣

今廢入新津

路近雙流縣
紫紆一徑斜
雞鳴深竹裏
暝色幾人家
日暮寒雲合
城荒野蔓遮
愁將蓬鬢色
絕域老霜華

新津縣渡江

南過蠶叢國
秋風正授衣
青山初日上
黃葉半江飛
脩竹連千畝
高栴徑十圍
臨江呼渡舸
極目一清暉

雨發眉州

五更吹角罷細雨出眉州
雜樹堆紅葉蠻荒感白頭
岷峨雲氣接邛嶲亂山稠
東望玻璃水風前葉葉舟

寄朱峨眉方菴兼懷蔣修撰虎臣

蔣時卧病峨
眉伏虎寺

絕域相逢感鬢華
幾行清淚落悲笳
愁中巫峽暮雲合
望裏峨眉秋月斜
方丈一燈誰問疾
孤帆萬里客還家
故人咫尺不相見
夢繞平羌江水涯

夾江縣

地近川南好孤城晝畫間江山真萬里雨雪到諸蠻馬
渡青衣水雲遮紫目關大峨天半落相見一開顏

夾江道中二首

沈黎東上古犍為紅樹蒼藤竹亞枝騎馬青衣江畔路
一天風雨望峨眉

嘉陽驛路俯江流寒雨瀟瀟送暮秋誰識蠻中風景別
洋州風竹戴嵩牛

九盤望峨眉

紺壁臨千仞蕭蕭木葉黃水流通越嶺峯遠入江陽十
月蠻雲澹三峨積雪蒼來朝掛帆去回首意茫茫

竹公溪二首

漏天未放十分晴處處江村有笛聲水遠山長聽不足
竹郎祠下竹雞鳴

竹公溪水綠悠悠也合三江一處流珍重嘉陽山水色
來朝送客下戎州

入嘉州問丁東院無知者過高望山趾廢寺鄭生

曰丁東寺也訪方響洞尚存感而賦此

廿年夢想丁東院何意丁東院裏來山水清音空復在
劫灰殘燒自生哀井欄僧汲稀銅鉢石甃秋深長綠苔

不遇江南老桑苧風鑪誰遣試茶盃

放翁丁東院詩我是江南老桑苧諸

君小住共茶盃山谷詩古人題作丁東水自古丁東直到今我為更名方響洞始知山水有清音

三登高望樓作

風流曾說荔支樓欄檻高明壓四州

謂我眉邛雅也

我頂晚霞

寒白雪江心殘照出烏尤雲烟早暮還殊態楓桺丹黃

只似秋自笑心情無賴甚清晨臨眺不梳頭

曉渡平羌江步上凌雲絕頂

真作凌雲載酒遊漢嘉奇絕冠西州九峯向日吟江葉

三水通潮抱郡樓山自涪翁亭畔好泉從古佛髻中流

東坡老去方思蜀不願人間萬戶侯

坡詩生不願封萬戶侯亦不願識韓

荊州但願身為漢嘉守載酒時作凌雲游

凌雲襍詠五首

爾雅臺

郭生注蟲魚遺跡空山裏何處蔡充兒幾為勸學死

大佛閣

韋南康鑿閣燬於
袁韜惟佛像存

三十六莊嚴不生亦不滅朝夕三江潮如聞廣長舌

治易洞

宋吳
秘

古洞何方廣垂蘿覆巖石想見昔年人研朱點周易

清音亭

振衣清音亭松桂鳴騷屑坐對大戕峯雲消露殘雪

洗墨池

東坡

初日石梁上猶傳洗墨池故山歸未得空和淵明詩

漢嘉竹枝五首

今嘉定州

龍遊城郭碧玻璃西望三峩曉黛滋分取三江作明鏡
鏡中各自照蛾眉

城頭山色入虛無城下清波望鬱姑白塔紅船歸去晚
嘉州也復有西湖

側生一樹會江門水遞年年進大藩寂寞蜀宮三十載
夕陽零落荔支園

竹公溪口水茫茫溪上人家賽竹王銅鼓蠻歌爭上日
竹林深處拜三郎

平羌峽裏府江來西望青衣抱郭迴大佛足前相會合

早潮晚汐不分開

三江岷江東來青衣水沫水西來至大佛前乃合流坡公詩奔騰過佛脚

土人謂岷江為府江

嘉陽登舟

青衣江水碧鱗鱗夾岸山容笑新悵望三峩九秋色
飄零萬里一歸人亭臺處處餘金粉城郭家家繞綠蘋

信宿嘉州如舊識
荔支樓好對江津

江行望烏尤山

墨魚吹浪一江浮
爾雅臺荒古木秋
碧水丹山留不得
風帆回首別烏尤

犍為道中

潮音閣下戒舟航
回首凌雲墮渺茫
土俗漸臨巴子國
江流遙接楚人鄉
爐熏細細縈琴薦
荻葉蕭蕭映筆牀
天外峨眉如送客
晴雲千片白毫光

叙州鎖江亭晚眺

望望朱提路夕陽千萬山落霞明極浦飛鳥近南蠻城
角旌竿直江亭鐵鎖閒鬱姑臺咫尺烟靄畫圖間

江安縣

斜日玉津渡青山銅鼓灘蠻江來浩蕩行路飽艱難晚
市稀橙客荒園罷橘官波濤三百里猶是怯兵欄

清溪

納溪縣西五里太白詩
夜發清溪向三峽即此

蠻雲漏日影淒淒夾岸蕭條紅樹低好在峨眉半輪月

伴人今夜宿清溪

瀘州登忠山

江源分內外千里會瀘州歷歷五峯影茫茫三峽流青
山烟外寺黃篾水邊樓夕照層城暮迴風引棹謳

撫琴渡

尹伯奇彈琴處

明月生琴渡似聞彈履霜猿聲何處發今夜宿江陽更
有巴渝曲能霑旅客裳楓林前路遠葉葉似瀟湘

晨起渡江登五峯過北巖寺

江郭曉烟合，攜琴來五峯。
水容青滑笏，山態碧玲瓏。
雲樹孤城外，風帆小市東。
香林迴望好，下界一空濛。

江陽竹枝二首

今瀘州

錦官城東內江流，錦官城西外江流。
直到江陽復相見，暫時小別不須愁。

妾如江心黃龍堆，江枯石爛長崔嵬。
郎如治平寺中塔，戎州西望忽飛來。

相傳叙州北江上塔頂飛至瀘州治平寺塔上而止

合江縣

縉部蠻荒水東南裂地來江臨巴子濶山倚少岷開故
國音書絕天涯老鬢催渝歌聲太苦中夜起徘徊

合江早發

放溜殘更裏熹微霽色閒鴉飛符縣北日出少岷山衆
水當渝會扁舟下瀨還客心爭歲暮猶自滯烏蠻

大磯腦

削壁臨江勢欲傾丹砂蘸葉一江明囊中正有鷺溪絹
只少黃筌為寫生

棹歌

紅葉磧邊紅葉飛黃魚沱上黃魚肥
百丈牽江怯西上
三巴迎客好東歸

江津縣晚泊寄懷李綏陽公凱

路入江州愛晚晴青山紅樹眼中明
斜陽潮送孤舟上
沙岸人牽百丈行故國至今悲蔓子
乘槎曾共訪君平
城南便是牂牁路一夕相思白髮生

渝州夜泊

塗山斜月落巴國曙鷄鳴亂艇烟初合三江潮夜生霜
寒催曉角石氣肅高城不寐聞猿嘯迢迢入峽聲

題三忠傳

故四川巡撫陳公士奇重慶知府王公行儉巴縣知縣王公錫

已失夔門險誰云蜀道難三江潮不到萬馬競傳餐故
國悲張許忠魂泣賀蘭當時渝水上慷慨白衣冠

塗山絕頂眺望

飛瀑落長虹登臨見禹功山圍巴子國苔沒夏王宮峒
俗烏蠻近畬耕白帝同渝州天塹地感慨大江東

舟出巴峽

曲折真成字滄波十月天雲開見江樹峽斷望人烟
新月數聲笛巴歌何處船今宵羈客淚流落竹枝前

長壽縣弔雪菴和尚

枳縣秋風愴客魂金川遺事忍重論誰從魚服悲宗國
唯有烏朝戀舊恩葉下沉湘愁北渚蕪生鄢郢哭東門
至今松柏灘頭水嗚咽寒潮弔屈原

涪州石魚

涪陵水落見雙魚北望鄉園萬里餘三十六鱗空自好
乘潮不寄一封書

早登涪州北巖訪伊川先生注易洞憩碧雲亭

巖有

山谷題鉤深
堂三大字

雞鳴截江去磊落見殘星古洞生蒼蘚層巖列翠屏五
溪秋水岸萬里碧雲亭蜀洛清流盡千秋忌獨醒

麻姑洞二首

神仙官府事紛然懶漫誰能更學仙但乞麻姑爬背癢

餘杭兌酒此中眠

洞口無人蘚自青
蓬萊清淺幾曾停
他時小別三千歲
又似當年過蔡經

忠州謁禹廟

空山神禹廟終古對巴臺
玉座秋苔長江雲暮雨來
八蠻通道路九鼎沒蒿萊
黑水梁州地芒芒問劫灰

屏風山謁陸宣公墓

賈傳長沙謫靈均澤畔吟
千秋同涕淚萬里更登臨
劍

北崎嶇日山東父老心陽城如可作為我助霑襟

詢白公東坡不得二首

巴歌渝唱總紛紛長慶新詩久不聞欲訪東坡但搔首
浪花高捲入蠻雲

東坡東澗綠成陰刺史當年憇愛深想見竹枝歌舞處
木蓮花映水林檎

壤塗早發

夢迴峽月落卧聽舟人語風便五更潮天明到南浦

萬縣

古南
浦地

萬縣有感

千秋南浦地險阻控三巴惡少仍雕面通侯各建牙何
人飼豺虎吾道一龍蛇鼓角寒城暮江流捲白沙

雲陽縣

十月雲安縣千崖石氣青江寒風颯颯猿嘯雨冥冥鹽
井筒時汲已歌酒易醒天涯連歲暮心折杜鵑亭

晚登夔府東城樓望八陣圖

永安宮殿莽榛蕪炎漢存亡六尺孤城上風雲猶護蜀
江間波浪失吞吳魚龍夜偃三巴路蛇鳥秋懸八陣圖
搔首桓公憑弔處猿聲落日滿夔巫

灋西謁少陵先生祠五首

萬古灋西宅斜連峽口關高雲魚武縣秋水麝香山老
作諸侯客心依供奉班樊川臨素滄遺恨不生還

白髮三川客新詩百鍊功飄零逐猿鳥得失感雞蟲弟
妹干戈裏朝廷涕淚中浣花形勝地回首雪山風

浩劫遺祠在依然白帝城岸連巫峽影門對蜀江聲太
息隆中業平生庾信情艱難詩萬首夔府至今名
已見浮三峽還憐到九疑湘娥何處是楚客至今悲
槎繫南溟近天連北斗垂江陵空望幸愁絕侍臣詩

欲去頻回首停舟灩澦堆東屯渺雲水西閣莽蒿萊感
事悲諸將懷人賦八哀昆明遺碣在落葉滿蒼苔

祠有石刻

秋興詩僅存昆明池水一首

登白帝城

赤甲白鹽相向生丹青絕壁鬬崢嶸千江一線虎鬚口
萬里孤帆魚復城躍馬雄圖餘壘跡卧龍遺廟枕潮聲
飛樓直上聞哀角落日濤頭氣不平

白帝城謁昭烈武侯廟

赤甲山頭雲氣蒼楓林蕭瑟落微霜魚人故壘生秋草
鳥道寒空掛夕陽當日君臣真灑落至今祠廟有輝光
江流薄暮聞笳鼓回首中原泣數行

舟下瞿唐別陳東海都督

諱福後
諡忠愍

十月瞿唐峽孤根濫瀕堆風雷高白帝雲雨暗陽臺朱
鷺軍中樂青楓渡口孟襄西迴望好欲去且徘徊

登高唐觀

西上高唐觀陽雲對舊臺瑤姬何處所望遠獨徘徊
恍忽荆王夢芳華宋玉才細腰宮畔柳併作楚人哀

神女廟

瑩篴山下路遺廟問朝雲冠古才難並流波日易曛
玉顏空寂寞山翠白氤氲東望章華晚含情尚為君

巫峽中望十二峯

十二峯娟妙輕舟望是非青天半雲雨夕日亂烟霏瀑
水臨江合三分水神鴉出洞飛朝雲無處所應待楚王歸

巴東秋風亭謁寇萊公祠二首

秋風亭上望搖落值秋風巫峽千帆上荆門一水通清
猿吟楚塞客淚落巴東故相還祠廟淒其伏臘同

壽寧何代寺猶說相公泉澹沲清江去淒涼古佛前傳
芭蕉楚些特筆記澶淵不見雷陽竹中書事可憐

抵歸州

亂石歸州郭危檣蜀客舟江山悲屈宋戰伐憶孫劉西
道連魚復東門望夏邱興亡紛在眼衮衮大江流

宜都又名

西道

歸州書感

歷歷青山遠更圍蕭蕭紅葉晚爭飛一天暮雨來巫峽
萬里寒潮到秭歸郢路蒼茫衰草徧楚宮蕪沒昔人非
灘聲半夜堪頭白況復天涯未授衣

秣歸夜泊

江水茫茫去西風感鬢絲峽深夔子國月上屈原祠灘
響夜方急猿聲寒更悲楚天搖落後何處採江蘼

五更山行之屈沱謁三閭大夫廟

斜月楚山外寒江初上潮左徒遺廟在未惜馬蹄遙國
破憐哀郢魂歸賦大招雲旗空悵望回首木蘭橈

題三閭大夫廟四首

懷沙千古恨弭楫弔靈均眇眇思公子依依問楚人招

魂龍貝闕遺恨虎狼秦愁絕涪陽浦年年杜若春
湘纍哀怨地自昔有遺音曉日空舡岸孤帆楓樹林數
窮詹尹策魂斷女嬃砧欲問離騷意巴東猿夜吟
久客懷徃路還登江上祠美人惜珍髫衆女妬娥眉楚
澤凋蘭葉巴巫唱竹枝九歌何處續宋玉有徵詞
鷓鴣鳴何早鳥飛思故鄉如何懷郢路終自棄沅湘三
戶餘秋草千山滿夕陽武關嗚咽水猶怨楚襄王

峽中舟夜

酒殘香燼暮江深
遙夜孤舟楓樹林
三峽流泉爭送客
不須更聽七絃琴

新灘二首

楚蜀諸灘首險在
兵書空舸二峽間

上灘嘈嘈如震霆
下灘東來如建瓴
瞥過前山纔一瞬
鷓鴣啼處到空舸

兵書峽口石橫流
怒敵江心萬斛舟
蜀舸吳船齊著力
西陵前去賽黃牛

空舸峽

月吐空舲峽流光楚塞旁
漁燈搖宿鷺蓬背受新霜
青草烟波濶黃牛朝暮長
曾為雲夢客回首憶高唐

黃陵廟二首

廟後峯頂有人
牛像宛然如畫

峽裏黃陵廟千秋俎豆新
禹功思癸甲靈笈佐庚辰
灘石冬逾壯風帆捷有神
旌旗臨絕壁長照大江濱
秭歸來百里突兀見黃牛
下水纔朝暮行人已白頭
山川夔路險疏鑿禹功留
尚憶平成日茫茫辨九州

抵夷陵州二首

西陵雄鎮地佇立望荆門蜀水天邊綠巫雲峽口昏三
湘初落木萬里飽聞猿翦紙勞僮僕為招久客魂
扁舟天上落回首萬灘高斜日明西塞秋風過下牢江
湖初莽蕩吳蜀幾旌旄至喜亭邊泊椎牛也自豪

西陵竹枝四首

今夷陵州

蜀道艱難易白頭羊腸虎臂又黃牛西陵纔過荆江出
聽盡猿聲是峽州

峽江三月櫓聲齊扣拍哀歌高復低十二碕邊初起汕

日斜還過下牢溪

夷陵俗以三月初八十八廿八三日
起汕相率扣拍而歌悲愴慷慨乃獲

多魚惟十二砵以上下
牢溪以下數十里為然

金釵繫接髻了枋又繫年年聚此鄉江上夕陽歸去晚

白蘋花老賣鱖鯉

俗以八月九月取鱖鯉魚先布網而
後下又謂之又繫其地曰繫曰枋

荷燈百尺接秋河猶似秦兵駐綠蘿更說元宵好風景

竹枝歌續採茶歌

元夕連袂唱竹枝採茶歌七夕家家
張荷葉燈云昔秦白起伐楚將燒夷

陵望見城中燈火
而止遂沿至今也

漢景帝廟

昭烈奉木
主至此

陽陵何處是遺廟此中洲落日西陵渡寒江楚塞樓天
心紛割據鼎足失炎劉太息英雄遠樓船下益州

宜都縣南中流大風

南首獠亭路茫茫白浪間風生羊角戍山盡虎牙關忠
信平生志波濤絕域還湘東飄泊日深入五溪蠻

枝江道中

愁絕丹陽道蕭條暮雨時天遙孤雁沒江濶一帆遲庾
信臺空在懷王冢尚疑且隨鷗鳥去今夜泊松滋

楚懷王墓二首

當年遺恨割商於故國秋風總廢墟
望裏丹陽杯土在寒潮猶似哭三閭

百里洲前望楚江斜風吹雨暗蓬窗
可憐雲夢三千里弱繳誰加鳥六雙

荊州懷古

白帝城邊醉放舟夕陽荊楚此登樓
驚心割據三分地放眼闕河萬里遊
山色茫茫江夏遠風烟漠漠渚宮秋

何須更續英雄記今古無人似仲謀

江陵書感

先祖方伯公曾以儀郎奉使扈故憲王之國

先公持節地今日復經過江漢流如昔興亡事若何人
歸銅馬後士豈鯽魚多信美非吾土登樓發浩歌

荆門州

望望荆門外茫茫驛路寬北風江漢起暮雪郢中寒野
燒荒原斷昏鴉古木殘遙憐季行役白髮望平安

望龐居士山

雲烟杳杳樹幢幢消息憑誰問
老龐斜日漢川秋水濶
居然一口吸西江

萬山

新釣槎頭縮項鰖楚姬玉手
繪紅鮮萬山潭水清如昨
只憶襄陽孟浩然

襄陽口號

豈有酖人羊叔子更無悔過竇
連波殘碑墮淚迴文錦
一種銷沉可奈何

羊太傅祠

峴首何寥落猶存太傅祠門臨漢川水淚墮郢中兒東
第無歸日西江有斷碑天涯落帆客一薦楚江蘼

峴山和孟公韻

往者不可作含悽方在今峴山風景地名士幾登臨陵
谷須臾改殘碑涕淚深高陽池上酒憑仗一開襟

隆中

咫尺隆中路如聞梁父吟地傳龍卧久山接鹿門深遺

憾留關隴高風激漢陰
沔江流不盡西望一霑襟

放鷹臺

漢江東去有高臺
烟樹蒼蒼楚望開
走馬銅鞮坊北路
少年齊唱野鷹來

劉景升冢

豚犬兒郎霸業空
冢中人不愧英雄
一杯遙酌襄江上
愛汝名高俊及中

渡漢江次樊城二首

昨過蟠冢陽今來漢臯曲萬里故人心江流鴨頭綠
樊口隔銅鞮江樓烏夜啼行人渡江去回首峴山西

大堤曲四首

何處白銅鞮相逢大堤曲樊城多酒家郎在誰家宿
送歡鳳林關別歡桃林岸紅桃作花時與歡復相見
漢水綠頭鴨朝朝自呼名何時覓歡去附書到江陵
東漢房陵來南流武昌去西漢下巴陵會是相逢處

估客樂三首

大舩趁潮來落帆向樊口盤鱠槎頭鱖盃泛宜城酒
大堤諸女兒三五花映肉斜月半江樓低徊就郎宿
與郎定情時歲蕤黃金鑰不識墮淚碑但道襄陽樂

新野道中

窮冬風易緊暝色路何長蠻落黃郵聚寒林赭水鄉雁
聲過宛口帆影下襄陽回首昭邱外雲濤墮渺茫

南陽

漢家陵闕晚烟重路入南陽識舊封何日赤符曾應識

至今白水尚朝宗炎精十世飛雄雉鼎足三分起卧龍
惆悵銅駝經幾度西風博望一聲鐘

卧龍岡

五丈原頭望秋風落大星空留高卧處古柏日冥冥

寄懷鄧州彭中郎直上兄弟兼憶仲亮寧遠

禹峰方伯

子

舊識中郎美新高第五名中原傳二妙故國繼三甥
阜帽遼東客青山宛葉情羨君名父子家本冠軍城

寄于浙川道子

西望商於地風前木葉紅
荒城三戶在官舍萬山中
歸路日猶遠故人今不同
浙江通漢水心折武關東

博望城

持節西窮萬里源至今黃鵠怨烏孫
空聞寶馬歸天廐不見征人入玉門

過長沮桀溺耦耕處

曾讀陶公傳
皜皜沮溺心耦耕餘故跡
流水抱寒岑
鳥

下日將夕雲歸山半陰從來避世者不厭入林深

葉公祠

蕭條醴水暮烟封古殿青苔上廢鐘地下子高應一笑
世間誰解好真龍

襄城道中

角角逐鳴雞遥遥信馬蹄雪殘雍氏北月落潁陽西
序已三冬晚途猶七聖迷汝南名士盡望古一含悽

拜李元禮墓

潁水東流去不迴漢家司隸汜城隈西園官爵歸常侍
北部髡鉗記黨魁一代荀陳師友誼千秋蕃武死生哀
歲寒謾謾松風裏猶似龍門御李來

渡汝水戲作襄城君曲

楚莊辛事
見說苑

玉劍翡翠衣光照清川口不願楚執珪願得執君手

潁川懷古

懷古過陽翟西風落照時廣成何處問童子信堪師喬
木臨清潁寒烟望具茨何因稅塵鞅還共羽人期

渡河西望有感

使者河源復卻迴杖藜曾記到雲臺高秋華岳三峰出
曉日潼關四扇開星宿海從天上落崑崙槎自斗邊來
何時更訪茅龍去東望滄溟水一杯

滎澤渡河二首

西溯岷峨萬里長大河北去渡滎陽平分兩戒迴中岳
直下三川阻太行咫尺風雲迷廣武蒼涼曠日射扶桑
時清久失成臯險釃酒黃流弔戰場

渺渺星槎擊楫登鴻溝極目氣飛騰已過白雪三城戍
初試黃河十月冰沙磧連雲朝牧馬獵圍行炙晚呼鷹
金堤東下夷門路落日寒烟弔信陵

贈徐東癡四首

東臯三畝宅歲歲掩柴關自得知仁樂因居廉讓間夕
烟隱桑柘曉色見雲山為問冥冥者何須放白鷗

浩蕩江湖興扁舟過富春兩臺雲漠漠千尺水粼粼偃
蹇狂奴態飄零沙社人垂竿與晞髮萬一共悲辛

秦楚縱橫地商於宛鄧西棧危驢背滑吟苦帽簷低戰
壘猶烽火窮途且杖藜倦遊歸卧穩高枕碧山棲

情親二十載回首颯風飈白髮催前事青松識後凋何
須論出處只合共漁樵別有人琴痛勞君賦大招

樵

為亡兄西

挽姜貞毅先生

諱堦字如農萊陽人明給諫以言事謫戍敬亭後流寓蘇州治命葬

敬亭山下

曾聞碧血裹朝衣滄海橫流萬事非生已變名吳市去

死當埋骨敬亭歸空山落日鳴鷓鴣孤墓深春長蕨薇

魂傍要離君愛弟英靈來往怒濤飛

先生弟吏部城字如須葬吳郡

輓蔣虎臣先生

先生養疾峨眉尚有手書見及

西清三十載九病一遷官晚憶峨眉好真忘蜀道難法
雲晴浩蕩春雪氣高寒萬里堪埋骨天成白玉棺

謝愚山寄敬亭茶著書墨四首

珍重宣州綠雪芽釵頭玉茗未須誇晚涼夢到雙谿路
宿火殘鐘索鬪茶

白甌親題記社前紅囊開罷淪清泉桐陰滿地蒼苔滑
紗帽籠頭手自煎

分來劒脊伴雲腴橫理庚庚玉不如更乞宣城諸葛筆
晴牕小試硬黃書

澤門暫與邑中黔一種高風比斷金至竟不須論白黑
東坡居士是知音

漫興十首

泚泚荆襄地當年割據州營連九節度星動五諸侯已

共長江險應關上將憂郭門傳息壤不障洞庭流

一線金牛道迢遙限雍梁峽猶傳禹鑿山忽兆彭亡戰
鼓黃陵廟訛言白帝倉魚鳧曾夢到回首閱蒼茫

嗚咽秦川水秋風入鼓輦妖星躔隴右大將出安西陸
陸將誰附蒼蒼迴不迷似聞寬大

詔未忍戮鯨鯢

烽火傳花馬將軍發賀蘭天心誅叛亟國法受降寬衙
帳青唐入沙場白骨寒亂臣誰賞死史筆後人看

均房山萬疊林菁杳難分故國傳鄖子名城屬冠軍風
烟迷楚望金鼓動秦雲父老思原傑當年舊建勲

不見離支熟閩州驛騎來大農師漸老使者節難迴五
嶺烽相照三山瘴未開冥冥炎海外目極釣龍臺

西北和親國王姬禮數殊一朝忘甥舅萬里送頭顱露
布明駝足軍鋒落雁都六師信神武羣盜敢枝梧

慘澹蒼梧埜風塵八桂林屠沽投間起巾幘負恩深銅
柱無消息交州竟陸沉何時大藤峽披豁散重陰

海內兵塵滿乾坤正氣孤數公明太義一死激頑夫關
塞青楓晚英靈白日徂他年看秉筆得慰鬼雄無

少日論兵事空驚老大身拊膺成一歎食肉爾何人劇
孟能傾楚弦高竟却秦白頭清鏡裏歸卧故山春

秋日過子吉讀書齋有懷茗文

翰林官自達疲馬獨行吟日午炊烟寂閒門落葉深平
生有知己高卧洞庭陰莫謂飛沈絕千秋共此心

謝孫思遠送茶笋

鬪茶竹塢麥秋寒燒笋僧樓穀雨闌寄謝江南老桑苧
也分風味到麤官

陳真亭僉憲殉節詩

諱丹亦閩縣人順治辛卯舉人自兵部郎中出為溫處道

僉事總兵官祖某
叛死之贈通政使

爭飛海水動妖氛大節堂堂獨不羣真見司農生擊賊
還同車右死鳴君赤城地遠埋殘骨朱烏魂歸哭陣雲
他日東甌應廟食靈旗風雨夜深聞

楊茶菴僉憲闔門殉節詩

諱三知良鄉人順治丙戌進士神木道僉

事參將孫崇雅叛同妻妾
二女赴井死贈光祿卿

西來鞞鼓震秦川
神木城頭火夜然
直向重泉尋八口
居然一死動三邊
飛書大將論功日
嚙齒孤臣入地年
彷彿井幹明月下
苔痕零落聽啼鵑

劉富川江屏殉節詩

諱欽鄰儀真籍廬陵人順治辛丑進士粵西亂死之贈光

祿少卿

白沙江上別蒼茫
憶爾廬陵節義鄉
萬里青燐連桂管
三年碧血照清湘
烏啼濺淚逢寒食
馬革驚心裹戰場

望斷銘旌何處是蒼梧愁絕暮雲黃

蘭谿丞徐君殉節詩

諱詰廣昌人貢士城破懷印死贈浙江按察司僉事

連城大帥豎降幡獨有微官死報恩故印猶存同杖節
平陽無地與招魂雙松幾歲哦廳事大鳥何年立墓門
聞道荒城還渴葬怒潮穿脇越江昏

定邊堡守備劉君夫婦殉節詩

諱士英朱龍據堡以叛與妻妾郭氏

李氏俱死之贈拜他喇布勒哈番世襲

河套南來花馬池嚴城一夕滿旌旗驚傳絕塞豺狼窟

坐失三軍熊豹姿恤緯孤忠留婦女成仁浩氣屬偏裨
高牙大纛工翻覆請視劉君墮淚碑

遙送嵇爾遐從軍荊州兼寄秦留仙李屹瞻二首

帕首韉刀氣不羣秀才今復學從軍也知好句輸中散
唯有相思寄楚雲

秦子清真五字詩李生磊落萬人姿他年幕府論功日
七寶莊嚴合是誰

贈郝雪海侍御二首

龍性詎能馴依然七尺身誰從燎原日還憶徙薪人肝
膽酬明主風霜老逐臣

孝陵松柏淚霑灑又重新

血戰蠶叢日愁雲壓闕中謗書翻置獄刀筆敢論功又
失巴西險何時劍外通憑君重草檄早為破田戎

秋夜同容齋說巖二學士聽楊山人彈琴

萬里東歸客七絲聞夜彈泉流巫峽裏猿嘯楚雲端淅
瀝楓葉落寂寥秋水寒無人知此意試問董庭蘭

紀事

見說溫泉仗經過畢郢原

天言傳近侍小隊駐期門
玉座人間悶銀蠶地下溫
冬青當日淚真荷

兩朝恩

雜感四首

隴水洮雲外傳烽萬里通天兵
張掖下露布朔方同賊
已亡方望時堪仗竇融
明年看置酒圖畫滿南宮

欽定四庫全書

精華錄
卷七

四十

飲馬洞庭濶連營笳吹聞南人知象主漢表失都君斑
竹祠邊水蒼梧野外雲何時真下瀨一試習流軍

戮力還羌帥孤忠有法王不緣蒙上賞何以警無將天
狗過秦野髦牛限鬼方古來稱隴蜀成敗幾蒼茫

一髮東甌路懸軍春復秋何人裹馬革幾輩爛羊頭禮
比長公主榮逾恩澤侯

聖朝寬大德不死竟何憂

精華錄卷七

欽定四庫全書

集部
精華錄卷八

詳校官侍讀學士臣陸伯規

助教臣常循覆勘

總校官進士臣朱鈐

校對官助教臣羅萬選

膳錄監生臣楊瓊

欽定四庫全書

精華錄卷八

刑部尚書王士禎撰

今體詩

用韻答別容齋說巖二學士詔菴侍讀

憂患餘生見面遲故人驚喜鬢成絲
茶盃冷澹香殘處塵尾橫斜月落時
沙磧斷鴻千點沒都亭衰柳數行垂
霑襟又作銷魂別不為中年好酒悲

再別李容齋陳說巖葉訥菴三子

長安幾度別忽作白頭翁君輩還簪筆吾生自轉蓬

王師懸楚塞羣盜橫關中努力匡時畧歸心滄海東

阜城感偽齊劉豫作

殘堞昏鴉外人烟古阜昌龍蛇逢戰鬪殺羶慨興亡父

老思宗澤朝廷負李綱紛紛齊與楚一笑對斜陽

元裕之詩

河邊殺羶尚能飛無角無鱗自
一齊張邦昌亦河間東光人

過邢子愿先生墓

秋晚犁邱道西風黃葉深婆娑數官柳惆悵少來禽
一代風流絕孤墳牧豎侵通家懷舊客重鼓雍門琴

閱先兄西樵故書泣賦

丹鉛脫手尚依然淚灑蛛絲對舊編南面百城如昨夢
河東三篋憶當年縱橫鼠跡承塵上零落苔花廢砌邊
痛絕人琴今已矣牙生從此竟摧絃

傷十笏州堂梅竹二首

西樵先生
讀書處

蒼苔被門巷風動蕭蕭竹孤鳳不重來磊砢空節目

種樹人何在三逢歲暮時夜來風雪裏無復舊連枝

過古城

格孫城外遠烟迷瘦馬凌兢上大堤茅屋幾人輸井稅
田家終歲把鋤犁殘碑剥落橫苔蘚古道縈迴長蒺藜
陵谷消沈盡如此一聲村落夕陽難

西堂甘橘初熟招東癡二首

昨宵霜信熟黃甘小閣離離夕照酣為報故人須過飲
掛帆何必洞庭南

楚頌吟來憶左徒
酒牀新漉待招呼
田園別後春蕪長
欲買青山種木奴

雪中題七賢過關圖

雲重雪堆門空堂破帽溫風流七賢遠
圖畫百年存烏沒藍田縣梅開灞水村
開元舊時老招得幾吟魂

題黃鶴山樵畫

憶昨茅齋雪霽時
地鑪松火夜談詩
春風騎馬長安去
如此溪山坐付誰

呂忠節公輓詩二首

為敬芝
侍御作

一自澠池渡風塵天地昏銅駝悲故國龍種失王孫
司馬空居洛巫陽詎返魂長令懷古者流涕上東門

紫陌臨伊岸青山抱洛中殺函失天險父老哭遺忠
秉國人誰在騎箕恨未窮橋陵西望近應逐鼎湖弓

為許生洲比部題梅淵公畫

柏視山中舊草堂溪流蓀蓀樹蒼蒼白雲谷口不飛去
卧聽松風春晝長

題董舜民蒼梧詞追悼訐士文友

南望毘陵路江流日夜東應徐常調盡嵇呂舊遊空才
子蒼梧怨清詞白苧工依然鄰笛起悽斷夕陽中

送許竹隱之紹興二首

一棹西陵去名山入剡中放衙臨鏡水行部逐樵風江
渚鷺鳥集蘇臺麋鹿空沼吳兼霸越懷古意無窮

蟬聲集深樹驛路遍槐花黃鵲逝千里浮雲天一涯鶯
啼范蠡宅草長謝敷家迢遞相思處春風滿若耶

夢中作

涼雲止復行
水花開更落
烟柳夕陽時
蟬聲動高閣

送董樵歸成山舊隱

白社何年別
威輦相逢颯
颯鬢毛蒼
飄零楚客紉
蘭佩
蕭瑟無且剝
藥囊隱處神
山鄰九點愁
來兵氣動三
湘
水仙操罷扁
舟去海水天
風萬里長

招魂

八桂荒雲外
三湘落照中
空城盡豺虎
戰士幾沙蟲
生

死無消息傳聞有異同
招魂闕塞黑杳杳暗青楓

秦中凱歌十二首

上相乘春西出師

至尊推轂建旌旗

兩宮絡繹黃封下天廡
飛龍賜與騎

新開麟閣賞元功
頗牧重看出禁中
此去西人須破膽

將軍昨日下遼東

康熙十四年圖公以副將
軍平察哈爾獻俘闕下

軍中歌舞喜投醪
令下如山戒驛騷
扶杖已聞秦父老

王師有

詔肅秋毫

天上黃河萬里來巨靈高掌抱雲臺遙看丞相行營過

日射潼關四扇開

韓文公詩日出潼關四扇開相公親破蔡州迴

涇原西北駐王師尺一無煩介馬馳共道

皇恩天浩蕩不教京觀築鯨鯢

莫愁登隴望秦川休道長安在日邊驛騎流星催露布

捷書三日到甘泉

虎狼十萬競投戈不唱三交龍上歌朝見降書來北地

暮看烽戍罷朝那

慶陽固原
相繼降

袞衣照路有輝光班劍威儀出尚方大將橐鞬迎道左

萬人鼓吹入平涼

三軍解甲隗囂宮百丈磨崖待勒功欲紀元和天子聖

更攜參佐上崆峒

丹青圖畫上麒麟五等俄驚

寵命新未許熊羆歸禁籞且懸堂印鎮三秦

部議圖海
封二等侯

有 旨

封二等公

河西三將氣如虹百戰功名次上公

詔下一時齊虎拜漢朝爭美實安豐

將軍張勇進爵靖
逆侯提督王進寶

進奮威將軍總兵官

孫思克進涼州提督

三月軍烽次渭橋旋看飲至紫宸朝空言韓范威名大

五路何曾制曩霄

得留仙書知將入楚

還吳戀子舍適楚動離心列戍洞庭埜征帆雲夢林寒

潮秋望遠楓葉暮愁侵此去逢漁父休為澤畔吟

寄汪茗丈堯峰隱居四首

卜築何峰好堯峰近太湖尊鱸供客饌橘柚足官租
泥飲從田父題詩付獠奴蕭然山澤裏真有列仙儒

海內紛傳檄烽烟數驛騷算緡諸道急伐叛幾年勞
久已疑吳淞頻聞赦貫高步檐還倚杖中夜首應搔

黃公壚下過感舊每停車哀樂中年事艱難遠道書
新知虛託契老輩久離居生意憐枯樹婆娑畧似渠

欲訪天隨子來過角里村五湖正秋色一棹到閒門林
屋探仙跡咸池問水源嗒然白雲外相對坐聞猿

題江辰六借書圖二首

何處淹留可判年亂書堆裏日高眠何人解似宣城守
手為江郎割半氊

飲馬荆江戍火紅龐翁書客悔雕蟲諸生亦有封侯相
一卷陰符兩石弓

題冒辟疆姬人圓玉女羅畫三首

雪後空庭氣蕭瑟千頭紉竹尚嬋娟畏寒凍雀不飲啄

斜日蹋枝相對眠

踈篁寒雀

記取凌波微步來明珠翠羽共徘徊洛川森森神人隔

空費陳王八斗才

水仙

堂堂策策百千頭荇葉菱花滿碧流彷彿吳興騎馬處

江南風色白蘋洲

蘋花戲魚

題汪季角百尺梧桐閣卷二首

別館多梧桐偶此成幽寂獨向高閣眠夜聞疎雨滴

百尺高樓上何人相往還夕陽海門樹秋雨江南山

再題梧桐閣卷

河漢澹中夜碧梧陰漸疎幽人坐高閣秋色滿巖居風竹同蕭瑟蒼苔倦掃除數峰江上好朝夕映琴書

和曹陸海舍人壽良懷古二首

長城自壞復誰尤戰地經過憶唱籌野鳥啼春寺門寂
可憐猶似白符鳩

右鳳山寺檀道濟戰場

鐵鎗名抵周陽五夾寨楊劉各一奇可惜英雄為梁死
不知世有鬪雞兒

右王彥章故宅

荅盤山拙菴道人寄電光雲鶴諸集

曹溪遊萬里酌水問南能世界隨緣住人天最上乘
蕭然白足侶不作紫衣僧寄我新吟卷清涼五月冰

悼亡詩二十六首

哭張宜人作

一錯誰能鑄六州蒙砧無復望刀頭當年對泣人何在

獨卧牛衣哭暮秋

少小香閨熟女儀，雞鳴長自軫風詩。
君如德曜齊眉日，我愧樊英答拜時。

門第河東雙戟圍，當年燕子傷誰飛。
可憐陌上花開後，常送香車緩緩歸。

小閣垂簾日掃除，鑪薰茶具宛精廬。
紅囊揀得釵頭茗，手淪清泉伴著書。

千里窮交脫贈心，蕪城春雨夜沈沈。
一官長物吾何有，

卻損閨中纏

直善切

臂金

辛丑春閨中友人許天玉公車過廣陵以匱乏告予適無一錢

宜人解腕上條脫付予贈之

樵蘇絕爨未知愁
林下風期矢白頭
廿載無衣搜蓋篋
不曾悔卻嫁黔婁

雪白花紅繡襦齊
頻年醜面祝中閨
牙牙學語今何似
忍聽驕兒索母啼

病中送我向南秦
感逝傷離涕淚新
長憶啼猿斷腸處
嘉陵江驛雨如塵

灞橋秋雨望秦川
劔閣西風聽杜鵑
萬里不歸歸有路
雙魚何處達重泉

三載西風雁影分
登高淚盡隴頭雲
從今腸斷重陽節

又採寒花酌細君

先兄西樵以
癸丑秋沒

蚤歲曾期共隱居
祇應桓孟得相如
青山縱有歸來日
更與何人挽鹿車

鋪首經秋澀綠苔
承塵蛛網任成灰
祇餘金縷裙猶在
爭忍無情布施來

遺掛空存冷舊熏
重陽閣閉雨紛紛
方諸萬點鮫人淚
灑向窮泉竟不聞

肅肅靈風冷
總幃亭亭孤月掩
重扉寶釵明鏡俱黃土
悔煞秦嘉上計非

帖子宜春認舊題
粧樓人去草淒淒
東風不啓歲蕤鎖
一任空梁落燕泥

樓角參差幾曲欄
繞欄親種碧琅玕
月明昨夜風驚竹
翠袖何人倚暮寒

春前小別死生分望斷新阡宿草墳我似東坡老居士
何年歸哭魏城君

年年辛苦寄冬衣刀尺聲中玉漏稀今日歲殘衣不到
斷腸方羨雉朝飛

愁見新年改故年朔風吹雪欲寒天黃金屈戌中宵閉
長伴鰥魚夜不眠

續絃膠與返魂香碧海青天路渺茫若使少君真有術
不辭千里到稠桑

熒熒薤露葉還低華屋山邱理亦齊
四十年來成小劫
息息何暇唱黃雞

春事愁中復病中可憐寒食到
息息故園夢去瀟瀟雨
一樹棠梨照殯宮

藥鑪經卷送生涯禪榻春風兩鬢華
一語寄君君聽取
不教兒女衣於戲反蘆花

陌上鶯啼細草薰魚鱗風皺水成紋
江南紅豆相思苦
歲歲花開一憶君

欽定四庫全書

精華錄
卷八

錦瑟年華西逝波尋思往事奈君何若為乞得江郎筆
應較文通恨賦多

官情薄似秋蟬翼愁思多於春繭絲此味年來誰領略
夢殘酒渴五更時

聞方山北山諸公連日出遊戲寄

公子春蕪白鼻騮病夫擁褐客天涯城南幾日無風雨
十里徐熙落墨花

絕句

石帆山後黃茅屋一樹寒梅作意香
長憶花開風雪裏
卧聞春雨滴糟牀

曹正子邀同家兄子側及諸君豐臺看芍藥晚過
祖氏園亭八首

回首旗亭畫壁時重來已是十年遲
應劉逝後風流盡
只有恒河照鬢絲

昔合肥公招同公戲茗文諸君遊此今公與公戲皆沒矣

依然春草樊川路竝馬來過覆盎門
記得城南天尺五
綠蕪紅藥水邊村

陂塘點點烏犍出夏木陰陰白鳥飛也似江南好風景
水田一帶學僧衣

宮錦千絲費翦裁
說他婪尾殿春盃
老顛賸欲相料理
乞取齊奴步障來

雨雨風風態自殊
花花葉葉不曾孤
更添練鵲和蟬蝶
便是徐熙六幅圖

霑溼春衣更不嫌
花枝姪姪雨廉纖
鬢絲禪榻心情改
閒看兔郎插帽簷

沙禽一一事高格烟柳斜陽初弄姿更愛風標兩公子

水荭花外立移時

晚晴賦白鷺潛來
今邈風標之公子

水檻清涼跂脚眠菱花菰葉一溪烟阻風中酒年年事
絕憶春江上水船

友人送白蓮花為詠

無復澄江載酒船折枝猶帶五湖烟香來月白風清裏
花放叢祠水驛前鴨啼池萍微雨後犀垂簾押夕陽天
魯連陂上新秋色觸忤閒愁又一年

初秋示董蒼水

零落交遊感式微與君邂逅忍相違
隆中自許真名士殿上誰知大布衣
越燕巢空秋近社鱸魚風起夢思歸
先生未是平原客玉貌塵中見亦稀

張員外園亭送金山人歸越

客有越鄉感抱琴辭上京離堂秋月色
別思楚鴻聲水國三千里冰絃一再行
成連何處去今夕獨移情

金孝章以壬子冬畫梅寄予兄弟今六年矣丁巳

七月先生之子祖生至京師始見之而先生與
先兄考功皆已下世愴然賦詩四首

拗取銅坑玉一枝江南春贈隴頭時到來已是塵沙劫
賦得瑤華欲寄誰

維摩方丈幾黃昏春草禪房日閉門成佛生天兩何處

暗香疎影為招魂

十笏先兄堂名春草
閒房先生所居也

花時鄧尉夢無聊十七年來似暮朝恨不相攜風雪裏

短蓬同繫虎山橋

當年五字寫柴桑又寄孤山世外香一幅生綃千載意

也應配食水仙王

辛亥歲先生手
寫陶詩見寄

西蜀

唐家宰相迴翔地漢代公孫割據秋
劒閣嵯峨仍北向
彭門波浪自東流風雲諸將爭秦棧
鼓角中宵夢益州
何日西南銷戰伐浣花行樂看遨頭

哭公弼吏部二首

零落親知更有誰聞君訣去不勝悲
彈琴古調千秋絕

說劍雄風一代奇
舊館脫驂應出涕
天涯磨鏡是何時
故人雙鬢蒼浪在
賸欲刊君第二碑

廿年藝苑忝同遊
迴憶音塵淚不收
結客曾傾四公子
論兵欲動五諸侯

星名

故人半化遼東鶴
世事終輸閣道

牛手定君文纔幾
日可憐馬策慟西州

丙辰春先生以全集寄予論次

見北山遊西山詩示謝千仞

吟眺清暉思不窮
昔遊如夢幾人同
憶君共蹋西山雪
坐聽清猿萬木中

山茶雪兔

石罅猩紅透幾枝花間東郭眼迷離漫天風雪鷹初擊

正好營君三窟時

郭河陽雙松平遠

為牧仲題

石骨峻嶒五鬣盤河陽筆底傲秦官興亡七百年朝槿
留得蒼蒼耐歲寒

孝昭皇后挽詞六首

金妃流塵掩瑤齋寶幄空禁花零曉露苑柳泣春風思

媚傳千古深恩徧六宮
唯留歌詠在應與二南同
上壽

慈寧日人知內則賢徽音殊未遠

文母至今憐淚濺鶯花色
神傷袞袞天淒涼餘故館猶
近濯龍前

祕殿傳金策神人覆玉衣
四星初應曜一鑑忽藏輝
脫珥言猶在乘雲馭不歸

皇情宵旰切永巷漏依稀

萬乘親臨送客車出國門羽儀辭禁掖笳鼓望陵園素
旒浮雲慘青山落日昏臣民同雨泣哀動鳳凰原
西汜沈寒月中天澹夕陽愁雲低墮樹春禁罷公桑楚
挽蘭風寂虞歌薤露長通靈應有夢可到

紫宸傍

渺渺沙河道淒淒玉輦空綺疏扃夜月總帳肅靈風故劍
皇心切祠官禮數同榮名綸綍貴早賁九原中

為尤展成悼亡二首

時予喪張宜
人三載矣

三年明月鑒虛帷那更吟君惆悵詩不分阿仄腸斷句
黃昏微雨畫簾垂

金昌亭下柳毵毵長記烏啼送曉驂風景不殊人不見
謝家飛絮滿江南

陳其年索詩送王生之襄陽

試說襄陽好曾遊路不迷江帆過峴首水竹繞檀溪市
上江陵佑機中竇氏妻不知征戍後誰唱白銅鞮

遙題王咸中石鵑山房四首

我愛堯峰叟

汪鈍翁

憐君比屋居雲林交爨畫烟火共村

墟顛倒牀頭屐逍遙谿上漁漢陰雞黍約今古意何如

高情耽野逸文采舊清門跡與市朝遠心將達者論飛

泉晴界道脩竹雨連村誰識逃名客蓬蒿方灌園

心遠地仍偏琴書雜坐眠湖霜收橘日社火焙茶天人

意孤雲外山容太古前叩門田父至襁褓亦欣然

筆墨誰能事吾宗今右丞

茂京作石鵞圖

悠然輞川路寫向剡

谿藤短笻宜行藥空林偶飯僧片帆天外影興到直須

乘

送宋牧仲員外權贛州四首

都亭一樽酒落日照行軒
帆下潯陽郭春過敷淺原
故人持使節微尚愛丘樊
想到西林寺清吟和夜猿

文成誓師處慘澹尚聞笳
野戍青山遠荒江白日斜
春風渡蛟浦夜雨宿龍沙
戰地多新鬼須添兩鬢華

章貢交流地孤城百戰餘
江山應不改父老問何如
五嶺稀烽火三湘動羽書
似聞兵馬後租賦未全除

贛石三百里寒江尺五流帆檣來島客風物逼炎州試
訪端明蹟應懷清獻遊山川供嘯詠莫似賈胡留

九日寄說巖院長訥菴學士

二公向
同內直

沈寥天氣渺愁予無恙黃花伴索居江介鼃鼃聞漸徙
時聞茶陵
湘潭捷鄉園鴻雁近何如千門落照涼颺發一片寒

砧木葉疎遙憶故人清切地登高彩筆奉

宸輿

以昌樂筆送容齋閣學戲成

承旨歸來每日曛揮毫猶足張去聲吾軍只愁坡老三錢
筆難稱郇公五朵雲

荅徐東癡隱君小雪見懷之作

積雪東原路孤村似剡溪幾年阻乘興千里憶幽棲凍
雀柴門掩寒烟古木齊不逢洛陽令僵卧到晨雞

題龔節孫種橘圖二首

震澤鱸魚欲上竿千林風露熟金丸美人無事披香坐
領得頭銜是橘官

會稽內史風流甚三百封題引興長何日扁舟洞庭上
與君小摘滿林霜

題其年填詞圖

玉梅花下交三九

其年
詞句

紅杏尚書枉擅名記得微吟倚

東閣梅花如雪撲簾旌

洪昉思送湖州茶笋二絕句

愛道前溪似若耶行滕歸去便移家
息息未訊溪山好

第一先分顧渚茶

周妻何肉斷根塵玉版聊堪結淨因贏得武康斑竹笋
從今休笑庾郎貧

二月二日大雪晨起懷愚山淵公耦長

夢覺聞飄瞥虛牕徹曉明蕭條同委巷悵望倚簷楹寒
色饑禽語荒堦折竹聲雙羊風雪路留滯遠含情

雪中簡秦對巖

第二泉邊路扁舟落鏡中林塘春命酒風雪夜推蓬別
鶴吳田渺歸鴻楚塞通朝來吟望處流霞滿房櫳

金定四庫全書
卷八
和施愚山喜梅耦長至

新詩冰玉質故人蘭蕙芬相逢姑射客宛對敬亭雲雪
色融春霽清談入夜分翻憐金錯贈十載託殷勤

題蘇臺楊柳枝詞後二首

汪鈍翁編修首唱
吳越和者數百人

白家半格詩曾見愛說蘇州柳最多

不似蘇州柳最多
樂天詩也今

日鈍翁吟卷裏雨條風絮奈君何

雁齒紅橋鴨嘴船麴塵風起豔陽天
明湖憶得吟秋柳

慘綠當年最少年

予賦秋柳詩時順治丁酉
海內和者亦數百家

送吳僧尚德歸堯峰

迢遞青山路風流白足師安居深雪裏行道落花時京
洛過寒食江帆拂柳絲歸逢尊宿問應識馬駒兒

送吳天章歸中條

中條最深處風物四時幽水鶴穿雲下林楓夾岸稠人
烟盤豆驛村路玉溪流卧起清暉裏蕭然何所求

送董蒼水歸雲間

昔作甌閩客漳泉正合圍江瑤驚旅食山鳥怪儒衣邊

徵逢人少諸侯好士稀長篇猶在篋感激涕交揮

蒼水闕歸

有見寄
百韻詩

送鄧孝威授正字歸海陵再示豹人

當年綺里季曾友夏黃公共詠紫芝曲俱棲巖穴中
翳
蒼鷲漢帝羽翼緬高風一出還歸隱白雲商洛東

送山史歸華山

華山丹頂鶴清唳向西峯不羨三珠樹長棲千歲松
林
巒有佳色眠起日高春石上流泉好菖蒲方紫茸

送吳僧秋臯之津門

上人有句云鳥啼殘雪樹人語夕陽山

愛君殘雪白宛似碧雲篇獨向中峯住深參五味禪直沽春水岸通潞夕陽船乞食王城去遙聞袒右肩

題顧茂倫雪灘釣叟圖二首

垂虹秋色東南好雨笠烟蓑送此生今日三高祠下過
唯君不愧隱人名

彷彿桐江百尺臺傍人漫作客星猜投竿一笑烟波外
陽鱖紛紛入釣來

送宗梅岑歸淮南

相逢纔幾日復欲返東原
梁父雲間樹蘭陵雨後村
雄雞能斷尾野鶴詎乘軒
一葉邗溝水隨潮到里門

擬山家閨怨戲為鈍翁編修作

璇璣賦罷氣凌雲下直金蓮每夜分
那憶璇璣圖上字錦機辛苦寄迴文

送李鄴臣赴東安

我愛瀟湘水粼粼見底清
稍聞征戍罷遙送使君行
別

浦石蘭長叢祠斑竹生經過道林寺沈杜有題名

午睡

蘄州笛材好八尺含風漪恰稱龜茲枕閒拋玉局棋涼
蟬陰卓午花鴨水平池富貴浮雲耳寧須熱客知

蠅

幾日亂朱紫商飈欣掃除孫郎彈不易戎子賦何如瑟
瑟涼初至營營計已疎何來遽集此往事笑中書

與陸冰修

金定四庫全書
卷八
我愛辛齋叟蕭然無世情笑看公府辟夢憶故山耕斜
日樹交陰微風蟬一鳴知君人境外寂莫道心生

初秋索梅耦長畫

詩到無聲足卧遊雨牕含墨對清秋不知鄉思今多少
祇寫澄江與北樓

送李武曾之鳳陽郡幕

武曾嘗客公嚴吏部近有
樂府後補題諸調最佳

年來巖谷競春姿誰遣青松獨後時七月僧廬常避客
八公山色又臨歧故人惆悵題襟集好句玲瓏散水詞

此地正連清潁尾西州應有淚如絲

送冰修歸海昌兼寄朱生二首

且住為佳耳將歸可奈何人隨吳雁影葉下浙江波好
往尋鱸膾誰當破雀羅小叢令老去重唱竹枝歌

予戊申歲

送冰修南還賦竹枝歌三首今十二年矣

老大身將隱飛揚氣自雄遊燕交馬客歸越事猿公仙
飯青精飢諸儒白虎通故人朱季在何處駕飛鴻

送李屺瞻歸涇陽

故國傳烽火歸來弔戰場
三秋看太白萬騎塞陳倉
射虎身猶健聞雞意不忘
悲歌燕趙別風雨又重陽

送葉井叔歸樊上六首

今日華陽館誰當是劇辛
重陽一杯酒風雨送歸人
秋盡黃州路千峰送馬蹄
夢回山館裏落月汝南雞
斷岸黃泥坂寒江千尺流
羨君歸去好雲夢澤南州
舊業在寒溪門前五株柳
遊子到家時日上樊山口
西山松樾多谷口好泉石
君登九曲亭蘇公有遺跡

我夢石魚湖依依問聲叟試尋脩竹林為予安井臼

花燭詞二首戲為鈍翁賦

鈍翁既改官翰林往迎兩如夫人皆不行而為

別納小姬
因賦是詩

碧玉迴身奈此宵汝南雞喚夜迢迢從今倦聽蘭臺鼓
莫更熏衣事早朝

羸女吹簫引鳳雛莫將縑素怨狂夫似聞一語分明寄
我見猶憐况老奴

雁

五聽長安雁征夫猶未歸重城聞搗練幾處寄寒衣雲
夢雪中去瀟湘蘋際飛沅州射生滿好避弋人機

題汪鈍翁洞庭詩後

蒲帆十幅逐沙禽罨畫湖山次第尋香稻炊來鱸切玉
高林霜後橘懸金且招龍伯閒投釣卻笑鴟夷苦用心
兩洞庭前三萬頃不能同上上頭吟

跋傅彤臣侍御楊柳枝詞後

衣上明湖舊酒痕漢南昨夢苦銷魂仙人有恨看銅狄

羌笛何心度玉門斜日靈和春殿樹西風清弋晚江村
卅分城畔新吟好只似三生石上論

問鈍翁編修疾

先生方丈似山茨聞道維摩病起遲乍可心情同木石
依然談笑却熊羆

坡詩此老神完中有
時談笑可却千熊羆

別裁偽體時流

忌獨抱遺經後代知遙憶玉堂清夜夢雪中花塢水邊
籬

又戲呈鈍翁二絕句

藥鑪經卷日相親隱几蕭然遠市塵聞道姬人怨服散
也須料理苦吟身

紅粧枕畔辟寒屏夢覺時聞烏夜啼若使清齋三百日
箇儂何異太常妻

為愚山侍講題嚴蓀友畫

山氣化雲雲作烟幽人蓑笠不知年清谿曲逐楓林轉
紅葉無風落滿船

送鄭郎赴粵西幕府

故郎中
次公子

當時紅旆向西川水部風流似鄭虔
被酒共眠金雁驛分題多在浣花牋
故人一別成千載公子重逢又十年
去謁征南年正少牂牁春盡水如烟

寄題鮑聲來草庭

愛君三徑好芳草滿南榮微雨過時綠
春風吹處生紛紜書帶色瑣細楚騷名
不是江潭客休悲鶻鴂鳴

謝梅耦長送木瓜

宣城木瓜壓西洛秋林黃處滿寒烟
寄來脩竹明牕底

金史四
卷八
留伴疎梅小雪前
橘柚初包難遠致
櫨梨雖好未須憐
相思愧乏瓊琚報
重賦風人第一篇

辱耦長枉酬佳作有方物昔年勞入貢之句偶傲
義山體再報一首兼邀施愚山陸辛齋同作

作貢當年事已陳
烟林搖落重含辛
空臨謝朓城邊水
不逐唐羌驛路塵
灰可藥魚妨稚子香
堪漬粉教姬人
北宮賦後情何限
解使韓宣賦更新

賈兵部改中條別業為巢雲菴索賦

右丞輞川宅江令攝山居本自香林境宜緒貝葉書花
藏共命鳥池長放生魚已悟非身義何須演鹿車

冬夜大雪

時
王師方取蜀

翳翳窮冬雪蕭蕭天北風清思戴安道壯憶大梁公寂
寞剡溪興蒼茫洄曲功聞雞不成寐松火夜深紅

李愬
弟德

亦封梁國公杜牧詩人
稱小太尉國號大梁公

聞奮威將軍保寧大捷

秦軍四道出巴庸在德何勞設險重寶玉大弓歸魯廟

華陽黑水盡堯封
實人筒布寬新賦
王祭包茅問舊供
遙憶師行過枕席
劒門千仞削芙蓉

冬杪卧疾寄愚山辛齋耦長

閉關當歲晏窮巷
少來車免豈相如
病交宜叔夜書松
聲含淅瀝雪色照
清虛獨愛文殊好
時時近起予

喜聞官軍已復保寧

大將臨興勢神兵
下武都地中鳴鼓
角天上拔蜚弧困
獸誰能鬪長鯨竟
就誅錦屏連劒閣
絕壁勒銘無

二月六日雪谷梅耦長兼示陸冰修

長安春雪好作態故霏霏乍入幽蘭曲真疑柳絮飛故
人同委巷曉色共清暉且擬調湯餅比鄰問陸機

同愚山侍講弘衍菴看海棠東梅耦長四首

韋杜城南十萬家東風處處酒旗斜不知冷節息息過
猶見僧樓一樹花

木魚聲靜佛香遲日午風簾自在垂好是維摩方丈室
恰逢天女散花時

沒骨天然別有情風流何處錦官城會禽圖裏依稀見
安得徐熙為寫生

平陽池館亞枝紅移入香林便不同莫為叢殘自憐惜

梅家詩體擅江東

耦長先有三絕句

送張仲誠知資縣

不憚三巴遠高名

萬乘知子規聲斷處山水雨來時囊有涪州易園無魯
相葵王褒諸弟子應習鹿鳴詩

齋中三詠

金孝章畫梅

鄧尉花時雪幽人日往還生綃纔半樹忽憶漁洋山

徐昭法畫芝

天池白雲裏寫此商山姿感君黃綺意勝食齋房芝

王玠右草書

逃名東海上時復帶經鋤自是高人筆非關餓隸書

送江辰六令益陽二首

作吏湘南去浩然尋舊遊秋風吹木葉初下洞庭流城
對茱萸岸香傳杜若洲毬門高唱在重上岳陽樓
小邑稀公事高齋俯洞庭佳期邀帝子遺曲感湘靈
水悠悠綠君山面面青詩成閒拄笏雲際九疑亭

送同年伊翁菴中丞巡撫雲南二首

金馬山前駐碧油青蛉塞外陣雲收

天威近已通諸賧王會依然徧九州銅弩雨深諸葛壘
叢祠春賽潁川侯饒歌鼓吹征蠻府萬里昆明是壯遊

柏臺新命

帝親除重譯西南罷羽書
雒將朱鷺皆內屬越人黃屋
竟何如賜來天庑飛龍馬
行避中丞赤棒車荒服祇今
勞

睿慮要令絕域化耕鋤

雨後再題梅瞿山畫松

林燈明暗雨模糊雷電冥冥夜氣孤
破壁長松欲飛去

曉來疑是坐龍圖

宣和御府所藏有
僧傳古坐龍圖

供奉某君歸吳門索詩四首

玉斧森沈罷講迴承恩別殿午仍開
凌烟將相尋常事

曾寫

龍顏日角來

歸釣吳淞四十鱸手炊楓葉飯
雕胡卻思待

詔蓬萊上細寫淋池斫鱠圖

弄筆明牕作卧枝寫生妙處幾人知
篋中藤角光於水

貌得蠻鳩義燕兒

一片青山短簿祠夕陽花隴帶茅茨歸心便逐江鴻去
已過橙黃橘綠時

聞道

聞道降王入經時尚濟西徘徊為怪鳥進退類藩羝鐵
券功何在金牀夢已迷回頭鄙隴遠不必怨然臍

答劉子羽見懷

聞君卜築處舊傍瑯琊臺海氣秋逾遠濤頭日幾迴秦
封猶廣麗石刻自莓苔想像高吟罷鯨魚跋浪開

閨中秋夜不寐悼亡

時張淑人
沒四年矣

商飈浙浙響庭除
竟夕蘭膏映綺疏
閨氣經時驗梧葉
月華重見溫方諸
紅牆銀漢途難越
碧海青天怨有餘
怊悵江東謝希逸
芳塵凝榭欲何如

進馬

庚申閏八月奮威將軍王
進寶自固原進馬二十匹

聞道安西將龍媒貢


御新籥雲近閭闔行地有騏驎
險阻三巴路驍騰百戰
身長鳴思駕馭終為靜風塵

聞蜀警懷茂衍大叅

行李捫叅井何時達錦城
懸軍今益部設險古南京
夔府公孫壘瀘江漢相營
艱危望消息天末未休兵

不得宋荔裳妻孥消息

宋玉今終古西川信未通
九原悲馬鬣八口寄蠶叢
想像離綿竹艱難出大蓬
猶聞豺虎亂未可泝巴東



精華錄卷八